



SIARAN MEDIA

FAEDAH SKSPS SEBAGAI TALIAN HAYAT PENCARUM, WARIS

KULIM, KEDAH – Geruh tak berbunyi, malang tak berbau. Pepatah ini menggambarkan bahawa sebarang malapetaka hadir tanpa dijangka boleh menjelaskan kehidupan seharian. Bagaimanapun, langkah persediaan awal dengan mencarum **Skim Keselamatan Sosial Pekerjaan Sendiri (SKSPS)** PERKESO mampu menjadi ‘talian hayat’ terbaik khususnya apabila ujian hidup datang bertandang.

Ziarah Prihatin oleh **YB Timbalan Menteri Sumber Manusia, Tuan Mustapha Sakmud** hari ini dimulakan dengan menyantuni keluarga mendiang **Tan Kheng Seong**, di Kulim Square, yang meninggal dunia akibat kemalangan ketika bertugas. Berkecimpung sebagai **akauntan bebas (freelancer)** selama 35 tahun, Encik Tan mula **membuat caruman Pelan 4 SKSPS** pada 23 Mei 2022, demi kebajikan isteri dan dua anaknya, andai perkara tidak diingini menimpa ketua keluarga berkenaan. Mendiang kemudiannya memperbaharui carumannya secara bulanan sehingga caruman yang terakhir dibuat pada **27 April 2023 untuk tempoh dua bulan sehingga 26 Jun 2023**.

Hanya beberapa minggu sebelum tempoh carumannya berakhir, tanggal **6 Jun 2023**, akauntan yang berusia 58 tahun ini meninggalkan isteri dan anak-anaknya buat selamanya ekoran kemalangan ketika dalam perjalanan pulang ke rumah, selepas selesai bertemu pelanggan. Caruman yang dibuat mendiang melayakkan warisnya mendapat manfaat SKSPS di bawah **Akta Keselamatan Sosial Pekerjaan Sendiri 2017 (Akta 789)**, iaitu **Faedah Pengurusan Mayat (FPM) sebanyak RM2,000** selain bayaran **Faedah Orang Tanggungan (FOT)** berjumlah **RM3,555 sebulan**. Bayaran bulanan FOT ini akan disalurkan kepada balu, **Khor Bee Kim, 53**, sepanjang hayatnya, manakala dua orang anaknya, **Tan Ting Yi dan Tan Yi Qing**, masing-masing berumur **18 dan 10 tahun**, berkelayakan untuk

menerima peruntukan faedah yang sama sehingga berusia 21 tahun atau tamat pelajaran di peringkat Ijazah Pertama.

YB Timbalan Menteri kemudiannya meneruskan ziarah kedua bagi melihat perkembangan pemulihan **Nur Iman Andrew**, seorang **penghantar pesanan makanan FoodPanda**, di kediamannya di Kampung Darul Aman. Encik Nur Iman, 42, telah terbabit dalam kemalangan ketika bertugas pada **2 Mac** lalu. Akibat kemalangan membabitkan sebuah lori, beliau mengalami patah tulang rusuk kanan, paru-paru bocor, pendarahan dalam otak, pendarahan hati dan buah pinggang. Nur Iman mempunyai **caruman Pelan 4 SKSPS** yang melayakkannya menerima manfaat skim tersebut apabila terlibat dalam kemalangan berkaitan aktiviti pekerjaan sendiri.

Sehubungan dengan itu, Encik Nur Iman yang diberikan cuti sakit selama 121 hari, menerima bayaran **Faedah Hilang Upaya Sementara berjumlah RM12,745.34** selain **bantuan alatan sokongan pemulihan seperti katil khas (High/Low Bed), lampin pakai buang dewasa, susu (Ensure Gold), mesin sedut kahak (Yuwell Portable Suction Machine) dan kerusi tandas beroda (Reclining Commode Wheelchair)**. Nur Iman merupakan **pencari nafkah utama** keluarga kerana isteri beliau, **Nor Hidayah Yusof, 33**, adalah suri rumah sepenuh masa yang menjaga dua orang anak perempuan, masing-masing berumur 14 dan 8 tahun.

PERKESO melindungi pekerja dalam sektor formal, pekerja domestik, pekerja asing, individu bekerja sendiri dan golongan suri rumah yang layak daripada musibah seperti kemalangan, penyakit, kematian mahupun kehilangan pekerjaan menerusi **Akta Keselamatan Sosial Pekerja 1969 (Akta 4)**, **Akta Sistem Insurans Pekerjaan 2017 (Akta 800)**, **Akta 789** dan **Akta Keselamatan Sosial Suri Rumah 2022 (Akta 838)**. Untuk maklumat lanjut, sila layari laman web rasmi PERKESO www.perkeso.gov.my atau hubungi talian **Careline PERKESO 1-300-22-8000**.

Dikeluarkan oleh:
Bahagian Komunikasi dan Hal Ehwal Korporat
27 Julai 2023

Untuk sebarang pertanyaan, sila hubungi:

Mohd Wazid Zaidon
+6017-619 3181

wazid.zaidon@perkeso.gov.my

Hamisah Hamid
+6019-383 3605

hamisah.hamid@perkeso.gov.my